

Ni President
Henry B. Eyring

Unang Manuglaygay
sa Unang Panguluhan



Pag-alagad kag Wala'y Katapusan nga Kabuhi

Ang Manluluwas amo ang aton halimbawa sang di-maiyaiyahon nga pag-alagad. Ang iya perpekto nga kabuhi nasentro sa pag-alagad sa Amay nga Langitnon kag sa tanan nga kabataan sang Iya Amay. Ang gintingob nga katuyuan sang Amay kag sang Anak amo nga hatagan kita tanan sang dulot sang pagkaimortal kag sang bugay sang wala'y katapusan nga kabuhi (tan-awa sa Moses 1:39).

Agud makaangkon sang wala'y katapusan nga kabuhi, kinahanglan gid kita nga mabag-o paagi sa Pagpasag-uli ni Jesucristo—mabun-ag liwat kag matinluan gikan sa sala. Apang, ang magagmay nga kabataan nga manubo sangsa walo ka tuig, wala sang sala kag natubos na paagi sa Pagpasag-uli ukon Atonement (tan-awa sa Mosias 3:16, 21; Moroni 8:10–12).

Para sa aton nga nakalab-ot na sa idad sang pagkamay-salabton, may isa ka manami nga plano nga nagatugot sa aton nga matinluan gikan sa sala kag maghanda para sa wala'y katapusan nga kabuhi. Ang ina nga paghanda nagasugod sa bunyag paagi sa pagbulut-an sang priesthood kag sa pagbaton sang Balaan nga Espiritu. Dayon kinahanglan naton nga panumdumon pirme ang Manluluwas kag sundon ang mga kasuguan nga Iya ginhatac sa aton.

Si Haring Benjamin nagsugid sa iya katawhan sa Libro ni Mormon parte sa kalipay nga naggikan sa

pagbatyag sang kapatawaran gikan sa mga sala paagi sa Pagpasag-uli ni Jesucristo. Dayon nagtudlo sia sa ila nga agud daloyon nga maangkon ang kapatawaran sang ila mga sala, kinahanglan nila tudloan ang ila kabataan nga mag-alagad sa isa kag isa kag kinahanglan nila nga mangin subong kaalwan agud masabat ang temporal kag espirituhanon nga panginahanglan sadtong yara sa ila palibot. (Tan-awa sa Mosias 4:11–16.)

Gintudlo man niya, “Kag yari karon, ginasugid ko sa inyo ining mga butang agud nga makatuon kamo sang kaalam; agud nga inyo matun-an nga kon yara kamo sa pag-alagad sang inyo mga isigkatinuga yara lamang kamo sa pag-alagad sang inyo Dios” (Mosias 2:17).

Si Jesus naglibot nga nagatudlo sang Iya ebanghelyo kag nagahimo sing kaayuhan (tan-awa sa Mga Binuhatan 10:38). Ginpang-ayo Niya ang nagamasakit. Ginbanhaw Niya ang minatay. Paagi sa Iya gahum ginpakaon Niya ang linibo sang sila gingutom kag wala sing makaon (tan-awa sa Mateo 14:14–21; Juan 6:2–13). Pagkatapos sang Iya Pagkabanhaw ginhatagan Niya sang pagkaon ang pila Niya ka Apostoles sang nagdungka sila sa baybay sang Dagat sang Galilee (tan-awa sa Juan 21:12–13). Sa Amerika, ginpang-ayo Niya ang nagamasakit kag isa-isa nga ginbindisyunan ang mga kabataan (tan-awa sa 3 Nefi 17:7–9, 21).

Si Santiago nga Apostoles nagtudlo sa aton kon paano ang kaluyag nga mag-alagad sa iban naghalin sa aton kapasalamat para sa ginbuhat sang Ginuo para sa aton:

“Apang ang nagatulok sa himpit nga kasuguan sang kahilwayan, kag nagapadayon, nga indi malimuton nga manugpamati kundi manugtuman nga nagabuhat, ining tawo mangin bulahan sa iya binuhatan. . . .

“Ang putli nga pagtuluohan kag wala'y dagta sa atubang sang Dios kag Amay amo ini: ang pagduaw sa mga ilo kag balo nga mga babayi sa ila kapitip-an, kag sa pagtipig sang iya kaugalingon nga wala'y dagta sa sining kalibutan” (Santiago 1:25, 27).

Ang isa sa mga garantiya nga ginatinluan ikaw amo ang nagatubo nga kaluyag nga mag-alagad sa iban para sa Manluluwas. Ang home teaching kag visiting teaching mangin mas makalilipay kag indi isa ka mabug-at nga obligasyon. Matalupangdan ninyo ang inyo kaugalingon nga masami nagaboluntaryo sa lokal nga eskwelahan ukon nagabulig atipan sang mga pigado sa inyo komunidad. Bisan pa nga diutay lang ang inyo kwarta nga ibulig sadtong may mas diutay, nagahandum kamo nga kuntani may mas madamo kamo agud mas makahatag pa gid (tan-awa sa Mosias 4:24). Mangin mas ganado kamo nga mag-alagad sa inyo kabataan kag magpakita sa ila kon paano mag-alagad sa iban.

Samtang nagabaylo ang inyo kinaugali, mabatyagan ninyo ang kaluyag nga maghatag sang mas dako nga serbisyo nga wala sang pagdayaw. May nakilala ako nga mga sumulunod sang Manluluwas nga naghatag sang dalagko nga balor sang kwarta kag pag-alagad nga wala gid sing bisan sin-o nga nakahibalo magluwas sa Dios kag sang ila mga kabataan. Ang Dios nagkilala sang ila pag-alagad paagi sa pagbugay sa ila sa sining kinabuhi, kag pagabugayan Niya sila sa palaabuton nga wala'y katapusan nga kabuhi (tan-awa sa Mateo 6:1-4; 3 Nefi 13:1-4).

Samtang ginatumuan ninyo ang kasuguan nga mag-alagad sa iban (tan-awa sa Mateo 22:39), nagabatyag kamo sang pagbag-o sa inyo bugal. Ang Manluluwas nagsaway sa Iya mga Apostoles sang nagbainasay sila kon sin-o gid dapat ang mangin mas dako sa ila tanan. Siling niya:

“Dili kamo magpatawag nga mga agalon, kay isa lamang ang inyo Agalon, ang Cristo.

“Ang labing dako sa inyo mangin-alagad ninyo” (Mateo 23:10-11).

Ang Manluluwas nagatudlo sa aton kon paano naton matun-an nga alagaran ang iban. Nag-alagad Sia sing himpit, kag kinahanglan gid naton magtuon sa pag-alagad pareho sang Iya pagtuon—sing amat amat (tan-awa sa D&C 93:12-13). Paagi sa pag-alagad nga aton ginahatag, sarang kita mangin mas pareho pa gid sa Iya. Magapangamuyo kita upod ang bug-os nga kusog sang aton mga tagipusuon agud palanggaon ang aton mga kaaway pareho sang Iya pagpalangga sa ila (tan-awa sa Mateo 5:43-44; Moroni 7:48). Dayon sa katapusan mahimo kita mangin takos para sa wala'y katapusan nga kabuhi upon sa Iya kag sa aton Amay nga Langitnon.

Ginasaad ko nga sarang kita mag-alagad sing mas perpekto samtang ginasunod naton ang mga ginpanudlo kag halimbawa sang Manluluwas.

PAGTUDLO GIKAN SA SINING MENSAHE

Si Elder M. Russell Ballard sang Korum sang Napulo'g Duha ka mga Apostoles nagpaisog sa aton nga magpangamuyo para sa mga oportunidad nga mag-alagad: “Sa inyo pangamuyo sa aga sa tagsa ka bag-o nga adlaw, pangabaya ang Amay nga Langitnon nga giyahan kamo agud makilala ang isa ka oportunidad nga ma-kaalagad sa isa sang lya bilidhon nga kabataan. Dayon maglakat sa bilog nga adlaw . . . nga nagapangita sang mabuligan” (“Be Anxiously Engaged,” *Ensign* ukon *Liahona*, Nob. 2012, 31). Binag-binaga ang pag-agda sadtong inyo ginatudloan nga magplastar sang lalabuton nga magpangamuyo tagsa ka aga para sa mga oportunidad nga mag-alagad kag dayon pangitaon ini sa bug-os nga adlaw.

LAMHARON

Sabat sa Iya Pangamuyo

Ni Siphilile Khumalo

I sa ka gab-i isa ka abyan sa iban nga relihiyon ang nagbisita sa akon. Sa masami isahanon ako nga nagatuon sang akon balaan nga mga kasulatan, kag ginpagwa ko na ang mga ini agud tun-an sina nga

gab-i. Ginpabatyag ako nga agdahon sia nga mag-upod sa akon pagtuon sang balaan nga mga kasulatan, pero ginkulbaan ako kag sa baylo nagsugod sa pagtuon nga isahanon. Nahibaluan ko nga ginbale-wala ko ang pag-pabatyag sang Espiritu. Makaligad ang pila ka minutos, mahinalungon ako nga nagpamangkot, "Gusto mo magtuon sang scriptures upod sa akon?" Nga wala sing pagpangalag-ag nagsabat ang akon abyan, "Huo."

Dayon nagbasa kami gikan sa Libro ni Mormon. Namangkot sia sa akon sang pila ka pamangkot, kag nabatyagan ko ang Espiritu nga nagagiya sa akon samtang nagasabat. Nagpaambit ako sang akon pa-naksihon parte sa kamatuoran sang Libro ni Mormon. Pagkatapos nga nahimo ko ini, siling niya sa akon, "Nagahibi ako kag nahadlok bilog nga adlaw. Bag-o lang gid ako nagpangamuyo sa Dios para sa bulig sang gin-agda mo ako nga magbasa sang scriptures upod sa imo. Mas maayo na ang pamatyag ko subong. Salamat."

Ang Ginuo naggamit sa akon bilang instrumento

agud masabat ang pangamuyo kag maalagaran ang isa sang lya kabataan nga nagakinahanglan. Nakahibalo ako nga ang mga pagpabatyag diosnon nga mga panulin gikan sa isa ka maalam, mahimayaon nga Amay. Kon ipahigad naton ang aton mga kahadlok, ginatugot naton Sia nga ipakita ang lya gahum paagi sa aton pagkamatinumanon.

Ang tagsulat nagapuyo sa Gauteng, South Africa.

MGA KABATAAN

Magpangita sang mga Paagi nga Mag-alagad

Sarang ninyo pilion nga sundon si Jesucristo kag mag-alagad sa iban. Drowinga ang inyo kaugalingon nga nagaalagad sa isa ka miyembro sang pamilya ukon abyan kag ibutang ang inyo drowing sa lugar nga mapadumdom kamo sini nga mangin maayo sa tagsa ka adlaw.



Ang Diosnon nga Misyon ni Jesucristo: Kasanag sang Kalibutan

Tun-i sing mainampuon ining materyales kag hibaloa kon ano ang inyo ipaambit. Paano bala ang paghangop sang kabuhi kag misyon sang Manluluwas makadugang sang inyo pagtuo sa Iya kag makabugay sinang inyo ginaalagaran paagi sa visiting teaching? Para sa dugang nga impormasyon, mag-log on sa reliefsociety.lds.org.

Kabahin ini sang serye sang Mga Mensahe sa Visiting Teaching nga nagalakip sang mga aspeto sang misyon sang Manluluwas.

Sa aton paghibalo nga si Jesucristo amo ang Kasanag sang Kalibutan, mapatubo naton ang aton pagtuo sa Iya kag mangin kasanag sa iban. Si Cristo nagpamatuod sang Iya papel bilang “ang matuod nga kasanag nga nagaiwag sa tagsa ka lalaki [kag babayil] nga nagakari sa kalibutan” (D&C 93:2) kag nagpangabay nga aton “ipataas ang [Iya] suga agud mag-iwag ini sa kalibutan (3 Nefi 18:24).

Ang aton mga propeta nagpamatuod man parte sa Kasanag ni Cristo. Si Pangulong Henry B. Eyring, Unang Manuglaygay sa Unang Panguluhan, nagsiling: “Sa tagsa ka tion nga pilion ninyo nga magtinguba nga mangabuhi pareho sa Manluluwas, mapabakod ninyo ang inyo panaksihon. Magaabot ang tion nga inyo mahibaluan para sa inyo kaugalingon nga Sia amo ang Kasanag sang Kalibutan. . . . Igasilak ninyo sa iban ang Kasanag ni Cristo sa inyo kabuhi.”¹

Si Elder Quentin L. Si Cook sang Korum sang Napulo’g Duha ka mga

Apostoles naghambal parte sa aton pagka-kasanag sa kalibutan: “Kinhanglan naton protektahan ang aton mga pamilya kag mangin yara sa atubang kaupod ang tanan nga tawo nga may maayo nga kabubut-on sa paghimo sang tanan nga masarangan agud mapadayon ang kasanag, paglaum, kag moralidad sa aton mga komunidad.”²

Gikan sa Balaan nga mga Kasulatan

Juan 8:12; Doctrine and Covenants 50:24; 115:5

Gikan sa Aton Kasaysayan

Ang mga babayi nga Santos sa Ulihing mga Adlaw sa karon nga panahon padayon nga nagapataas sang ila mga kasanag.

Sa ika-80 nga panalgan sang isa ka mataas kaayo nga bilding sa Hong Kong, China, isa ka solo-lawas nga sister nga may pisikal nga mga kasablagan—ang amo lamang nga Santos sa Ulihing mga Adlaw sa iya pamilya—nagtuga sang puluy-an nga palasilungan kon sa diin sia kag ang mga bisita sarang makabatyag sang impluwensya sang Espiritu. Ginabutang niya ang iya balaan

nga mga kasulatan, mga manwal sa Relief Society, kag hymnbook sa malapit lang. Nagabiyahen sia sa templo agud maghikot sang mga ordinansa para sa iya mga katigulangan.³

Sa Brazil isa ka matarong nga iloy ang nagpadako sang iya kabataan sa kasanag sang ebanghelyo. Ang mga ambahanon sang Primary ang mabatian sa sulod sang iya balay, kag ang mga larawan gikan sa *Liahona* sang mga templo, mga propeta sang Dios, kag sang Manluluwas napaskil sa mga dingding. Sia kag ang iya bana nagsakripisyong agud mahugpong sa templo agud ang ila kabataan sarang mabun-ag sa sulod sang pangako. Ang iya padayon nga pangamuyo amo nga buligan sia sang Ginuo nga padakuon ang iya kabataan sa kasanag, kamatuoran, kag kabaskog sang ebanghelyo.⁴

MGA TANDA

1. Henry B. Eyring, “A Living Testimony,” *Ensign* ukon *Liahona*, Mayo 2011, 128.
2. Quentin L. Cook, “Let There Be Light!” *Ensign* ukon *Liahona*, Nob. 2010, 30.
3. Tan-awa sa *Daughters in My Kingdom: The History and Work of Relief Society* (2011), 163–64.
4. Tan-awa sa *Daughters in My Kingdom*, 164.

Pagtuo, Pamilya, Bulig

Ano ang Sarang Ko Mahimo?

- 1.** Hambali kon ano ang kahulugan sang mangin isa ka kasanag sa kalibutan sa karon nga panahon.
- 2.** Binag-binaga kon paano ang pagsunod sang kasanag ni Cristo makabulig sa inyo nga mabatas ang mga pagtilaw.

© 2014 iya sang Intellectual Reserve, Inc. Tanan nga mga kinamatarong ginahuptan. Ginbalhag sa Pilipinas. Petsa sang pagtugot sa Ingles: 6/13. Petsa sang pagtugot sa paglubad: 6/13. Paglubad sang *Visiting Teaching Message*, *March 2014*. Hiligaynon. 10863 861